

東華續錄

光緒二百四

臣朱壽朋敬編

臣沈彭年恭校

十二月癸亥朔諭朕欽奉 慈禧端佑康頤昭豫莊誠壽恭欽獻崇熙皇太后懿旨御史趙炳麟奏請定

教育宗旨一摺學術人心關繫至大疊經降旨宣示學堂以中學為主西學爲輔培養通才首重德育並以忠君尊孔尙公尙武尙實諸端定其趨嚮凡在臣民豈容不修明倫理顧行顧言茲據該御史奏稱曲阜學堂開辦伊始請以明人倫重躬行爲要義等語亟應申明前旨俾共切實遵行所有曲阜學堂應如何慎選師儒注重行誼著學部會同張之洞悉心妥議詳訂規則奏明辦理○甲子諭軍機大臣等有人奏奉天錦州府義州知州陶應潤貪鄙衰庸縱盜肆搶著趙爾巽按照所參各節確切查明據實具奏毋稍徇隱原奏著鈔給閱看將此諭令知之○乙丑 上詣 大高殿祈雪○丙寅諭朕欽奉 慈禧端佑

康頤昭豫莊誠壽恭欽獻崇熙皇太后懿旨禮部奏元旦禮儀一摺元旦令節皇帝率王公百官著在皇極殿行禮停止筵宴其在外公主福晉命婦均著進內行禮○諭前據御史成昌奏參山東巡撫楊士驤各款當經派令清銳前往山東查辦茲據查明覆奏山東巡撫楊士驤被參各節均查無確據惟於籌款

局委員因公派斂並曹州文武各員捕盜不力未能先事豫防失於覺察殊屬疏忽但據稱該撫到任以來於地方一切要政尙能出力舉辦卽著毋庸置議山東候補道朱鍾琪辦理捐款不實不盡曹州府知府丁鎧身任地方兼司營務操縱失宜均著交部議處曹州鎮總兵任永清暮氣已深難期得力著勒令休致前統領練隊補用知府倪毓棻訓練無效羣匪寥寥著以通判降補前幫統防軍營管帶先鋒左翼左營補用副將洪殿元委靡自安寸功未立著以游擊降補前管帶先鋒左翼右營補用守備馬振邦舉止輕率聲名平常著以把總降補前管帶左翼防軍左營補用副將楊良輝營規鬆懈兵多騷擾左翼防軍後營哨官楊穀把總沈得勝盜劫左近畏葸無能左翼防軍後營哨官候補把總孫方塾嗜利營私罔恤人言先鋒左翼左營哨官候補把總隨興隆獲盜不究有心玩忽均著卽行革職永不敘用防軍前營哨官五品軍功侯廷傑藉端斂費民怨沸騰前曹州鎮署巡捕陸恩福差弁楊鳳嶺呂煥普朦報招搖狼狽舞弊著一併斥革驅逐回籍交地方官嚴加管束楊士驤身膺疆寄責任綦重務當振刷精神於一切應辦事宜破除情面切實整頓以期吏肅民安無負委任所有該省未經奏明苛細捐款著認真裁撤以紓民困各局所名目複雜著卽酌量裁併另片奏舉辦清鄉請責成各鄉自辦等語著該撫體察情形妥定章程奏明辦理○以瑞豐爲內閣學士○丁卯 上詣 奉先殿 壽皇殿行禮○以張定邦爲山東

曹州鎮總兵○戊辰學部奏近年以來屢奉 明詔普興教育京外各學堂次第舉辦固已略具規模而海外僑民同是 朝廷赤子其平日惓懷宗國歷久不渝若再囑以詩書勉以忠孝則內嚮之意益篤愛國之忱益堅於以維人心而收國權所關實非淺鮮查美洲華僑之數當光緒八九年間約三十餘萬人十八九年間減至二十餘萬人迨二十九年以後僅有十餘萬人蓋自禁工之議起所以限制華民入境者綦嚴卽僑居已久者亦不得同享其優待之利益近日美國重申阻止亞洲幼童共校之禁紐約各埠華商屢電臣部籲求救援想見流離無告窮則呼天之情殊堪憫念臣等日夜焦思謀所以維持之法舍乘時勸學速興教育無從措手謹熟籌利害爲我 皇太后 皇上陳之查華人之在美者大都習於工商勤儉耐勞終歲所贏輦回中國通商漏卮得以稍資補助比年工商實業日卽衰微固由苛例使然亦由華民漫無學識未能競進及今不圖再閱十年恐知識愈加桎梏生業愈形彫敝可爲長慮若施教育以擴其知識操業日精生計自裕生齒亦孳而愈繁其利一也近年華人入美國專門大學肄業者甚多大率內地人士稍具根柢者始往游學而華僑子弟能入美國大學者殊爲罕觀間有其人亦以生長外國於宗國文化遺亡已久於國事更漠然若忘縱使學業有成亦終楚材晉用爲外人所驅使若施教育以發其愛國之心俾知孔教淵源 累朝恩德自可默相維繫收爲我用其利二也況近年異說朋興邪

歷之徒流毒海外華僑之稍明忠孝大義者固不至爲其所誤而勞力小人未嘗學問往往爲所煽惑不能辨其是非滄海橫流罔知所屆尤不可不預爲之防若施教育以端趨向而正人心俾知朝廷覆載之恩無遠弗屆海外愚氓斷不忍自外生成其利三也夫以教育不興則害如此教育興則利如彼惟有派員赴美宣布朝廷德意指陳教育宗旨爲今日萬不可緩之圖然非得有忠實可靠之人素爲旅美華民所信服者亦恐無濟茲查有內閣侍讀梁慶桂係廣東番禺縣舉人學優品正鄉望素孚堪以派往美國各埠經理其事所有調查學童勸勵紳董儲備教員編設學科補助經費應如何妥籌辦法之處均由該員隨時隨地呈報臣部核辦至該員往返川資抵美後所需費用概由臣部發給如蒙 俞允并懇 明降諭旨宣諭華僑務以忠君尊孔爲宗旨使該僑民知身居海外仍在 聖朝軫念之中庶幾因感生奮愈以勤學問篤惻忱於維繫人心潛消隱患不無裨益得 旨如所議行○直隸按察使王清穆以病免○己巳 上詣 正中殿拈香○諭朕欽奉 慈禧端佑康頤昭豫莊誠壽恭欽獻崇熙皇太后懿旨前以東三省民物凋殘瘡痍未復特派載振徐世昌前往查勘現據奏陳各節披覽再三彌深廑念該省當兵燹之餘亟應培養元氣固植根本深宮惓念民瘼無時不軫切惓懷所有清賦捐稅等事皆地方應辦之政乃或操切擾累腴削煩苛凡我商民何以堪此一切新政必須次第舉行籌款尤在得人務

當體恤民艱掃除積弊總使閭閻輸一分貲財卽受一分利益庶幾事無不舉民亦相安著各該將軍體察情形慎選廉吏力祛壅蔽嚴杜侵漁廣闢利源豫謀生計以期漸臻富庶用副朝廷勤恤民隱之至意

○以陸嘉穀爲直隸按察使○壬申諭軍機大臣等御史黃昌年奏粥廠放散米石情形及圖法不能畫一流弊甚多各等語著民政部度支部順天府分別查明妥籌辦理以恤民艱○癸酉度支部奏河南道御史趙啟霖奏禁煙期於實行一摺光緒三十二年十月二十七日奉 旨度支部知道欽此由軍機處鈔交到部原奏內稱鴉片之爲中國害從前屢次議禁而未能者或隱匿而涉欺朦或激切而滋疑阻或騷擾而生事端自以徵爲禁之說起徵稅雖多而吸煙如故於是煙稅遂爲入款大宗值庫款支絀之時遂有難遽行禁絕之勢近奉 明詔著定十年以內將洋土藥之害一律革除淨盡經會議政務處擬定章程嚴密周詳固已洞中鍵要然臣不免鯁鯁過慮者以爲不難於立法之嚴明而難於奉行之切實必大綱有提挈之處而後全局有振起之機謹酌擬四條以期禁煙新章易於舉行又稱此次奉 旨禁煙適當立憲之時非但中國強弱所關抑亦各國觀瞻所注若徒取辦文牘不能實力推行於國勢國體俱有關繫總期綱舉目張令行禁止以除毒害而圖振興計一二年之內必能將土藥實在少種若干土稅實收若干確鑿可據不涉虛僞然後能與英人協商限制洋藥令其分年遞減以遏來源斷非敷衍玩延

所能有濟各等語_臣等伏查自奉 旨禁煙續據會議政務處妥議章程奏准通行觀聽所傾全國精神爲之一振但能切實舉行固無難刻期收效該御史擬於京師設立禁煙總局請 欽派大員專司其事自係爲實力奉行起見又擬於上海設禁煙總會推之各省亦與會議政務處奏定章程相符惟以上兩層均屬地方行政之事稽查一切又關繫巡警自應由民政部妥定章程奏明辦理至擬改膏捐大臣爲禁煙大臣或稽查土膏大臣並將土藥歸公家專賣各節查東西各國凡消費品多有由公家專賣之法蓋專賣者加稅之極端辦法也前江鄂督_臣會奏變法條陳卽有官收洋藥之說特以造端宏大急切難得辦法竊曾一再思維專賣之法當合洋土各藥調查明確預籌收賣成本其繁難十倍於加稅聞日本煙草專賣之法前後籌之十年固非遽然所能從事前辦八省膏捐嗣又改爲土藥統稅推行各省正擬藉以調查固不僅爲籌款起見近來逐加總核始於產土行銷各數略得梗概洋藥一層現在外務部正與美使提議自當相度情形再定辦法夫有一日之稅卽不能無專司之員該御史虛名稱仍舊則中外注目以爲國家仍恃此大宗入款雖禁令並非實心必致各懷觀望等語陳義甚高於事實仍未及十分體察且該御史所稱一二年內將土藥實在減種若干土稅實收若干確鑿可據不涉虛僞尤非有綜核之所無由得其實際所有督辦土藥統稅應請仍舊辦理以專責成總之立法期於必行積弊無難立去

會議政務處所議章程悉稱嚴密應請 飭下各將軍督撫飭屬遵照實力舉行務期禁令行止以免貽害而圖振拔得 旨如所議行○農工商部右侍郎顧肇新卒賜卹如例○甲戌以楊士琦爲農工商部右侍郎○乙亥諭軍機大臣等人奏疆臣甄核不公有關刑獄請飭查嚴辦一摺已革浙江嘉興縣知縣瞿倬所著嘉興冤獄一冊案情出入極大現在是否已經審結其中有無冤抑著張曾敳秉公查訊毋稍徇徇原摺著鈔給閱看將此諭令知之○以林開謨署理江西提學使○學部奏本年十一月十五日軍機處交片本日御史徐定超奏中西醫派不同擬請分辦學堂以宏造就一摺奉 旨學部議奏欽此原奏內稱中西醫派確有不同造士不能合併中醫多理想西醫憑實驗中醫主述古西醫貴求新其詣力獨到之處各有不可思議之精微學者各專一門已苦難於精到必欲兼營並驚心力更有不遑等語臣等竊維中西醫術各有獨到之處奏定醫科大學章程於中西醫學必令兼修未嘗偏廢惟中西醫理博大精微融會貫通必俟諸已入分科大學之後下此則兼營並驚學者輒以爲難誠有如該御史所陳者查京師設有醫學館擬卽改爲京師專門醫學堂中西醫學分科肄習各以深造有得切於實用爲宗旨其應如何補習普通編設課程酌定年限之處容俟 臣部遴派委員詳議章程具奏請 旨辦理得旨如所議行○學部奏現在日本教育日有進步文部省辦事條理極爲精密可供參攷借鑒者實多亟

應派委專員常川駐日調查並赴文部省攷求隨時報明臣部以資攷鏡查有游學日本畢業學生劉崇傑高逸二員諳習日本情形通曉教育前經臣部札派爲三等諮議官以之派爲常川駐日調查學務委員實堪勝任得旨如所議行○丙子諭軍機大臣等翰林院侍講吳士鑑奏江西義甯州萍鄉縣鄰近湘省轄境太寬請析疆分治一摺著端方張之洞瑞良岑春煢體察情形會同妥議具奏原摺著鈔給閱看將此諭令知之○戊寅允張之洞奏蠲緩湖北枝江等各屬州縣錢糧漕糧○己卯因京師得雪上詣大高殿報謝○諭翰林院侍讀馬吉樟奏糾參大員一摺郵傳部右丞陳昭常署右參議施肇基衆望不孚均著開缺唐紹儀引用丞參屢招物議著該侍郎懷遵前旨謹慎奉公認真辦事倘再師心自用定不寬恕所有該部丞參員缺著該部堂官慎選妥員奏明辦理○庚辰法部奏光緒三十二年九月二十日欽奉 懿旨刑部改爲法部專任司法又議各部院等衙門職掌事宜及員司各缺仍著各該堂官自行核議悉心妥籌會同軍機大臣奏明辦理等因欽此臣等跪聆之下感悚莫名竊維理刑一官關係重大現今易名法部其範圍更廣其組織更難由舊以入新似因而實創受任以後博訪深思累月圖維始有端緒伏讀 欽定大清律例一書原有吏律戶律兵律工律名目精深閱遠無乎不賅第時代既早故商律路律諸端尙未議及若近今東西各國則有公法私法行政法國際法以及民法民事訴訟法刑

法刑事訴訟法類皆萃全國議會之精神復參以百年民情之習慣斟酌妥善都歸畫一司法衙門乃總匯而實行之使舉國之人胥受治於法律之內故內而各部省之法制歸其綜理外而大審院控訴院地方裁判所一切均受其監督非徒管理刑名稽核案件已也今夫作室者必先立其基礎而後牆宇可循序而施行遠者必先定其指歸而後跬步可計程以赴臣等深維今昔之事勢熟審中外之機宜上稟宸謨悉心籌畫固不敢矜言遠馭遽涉於張皇亦不敢狹小規模自贖其職守謹就愚慮所及爲我皇太后皇上縷晰陳之一在申明權限也從來事機敗壞由於權限不分茲當改制之初自應慎之於始比者法部專任司法大理院專掌審判明諭煌煌固已釐然悉當則凡司法官吏之進退刑殺判決之執行關局轄地之區分司直警察之調度皆係法部專政之事應由臣衙門隨時奏明辦理至於直省刑事稿件原議官制法部及大理院均有覆核明文蓋以生命所關倍當矜慎改革伊始不厭求詳擬由各直省分達部院經大理院覆判後咨部核定卽由法部具摺請旨施行如有情罪未符仍咨回大理院自行駁正如此則司法審判各有主持而事權不至淆亂矣一在分定職掌也刑部向設十七司分掌各省刑事案牘纂繁原議改爲六司恐滋竭蹶且部中所屬皆刑罰事項牽連輻輳難以類分既當循守舊章尤待擴充新政茲擬遵設承政參議兩廳綜轄部務設參事四員襄理更由各司派員會辦不設專缺

此其綱領也外設八司曰審錄曰制勘曰編置曰宥恤曰舉敘曰典獄曰會計曰都事事具裒益其簡煩
官則均平其職掌仍飭各司按省按事酌量分股各專責成其涉繁雜難以類從者設收發一所以包括
之至應設之七八九品京官錄事除由臣部筆帖式考選改充外量才委用務令舉能其官無替厥職而
庶事不虞叢脞矣一在廣行調查也變制之初百端草創非體察我國人民之程度採訪列邦制作之精
詳必不能任用適宜推行無阻日本明治初政銳意更新最注意於法律之改良分遣賢能徧游歐美歸
而釐定法制驟進富強亦前事之師也中國此時舉辦新政若禁刑訊若重證人各直省獄局之積習若
何各地方監獄之內容若何擬選明達司員委令回籍分行查察尤明達者酌派游歷東西各國繁短較
長務取彼國之所優以補我國之不足惟遠游必需重資考察貴有專門多數派充實非易易俟陸續規
畫擇員分遣以宏探討而備觀摩此臣等所妥籌而思爲憲法儲其用者也一在彙訂法律也現在各部
院改定官制舊時法律當有變更此衙門之法律與他衙門之法律互相抵觸者在所不免且航路電礦
工商律日有發明若不求畫一之規則受治者必將無所適從而舞文者轉得任意出入查美國官制各
部皆有法官協同經理立法誠善但中國法學尙鮮專長不必慕其名而在師其意且與律例一書有史
戶兵工諸律之旨相合擬請 飭下各部院衙門將現行則例全咨法部由臣等派員詳細稽核如應行

例案有互相牴牾之處會同該部院堂官酌量修改以歸統一而免參差此又臣等所妥籌而思爲憲法集其成者也至於欲才能之樂爲用則祿脩不能不籌欲任使之得其人則遴選不能不豫以及廳所之如何增設監獄之應否改良所有一切應辦事宜容臣等次第籌商續行具奏謹先將法部官制繕具清單恭呈 御覽如蒙 俞允卽由臣等分別保薦請 簡請補得 旨如所議行○辛巳以熙彥爲農工商部左丞耆齡爲右丞沈雲沛爲左參議○壬午允恩壽奏蠲緩山西陽曲等廳州縣錢糧○允張人駿奏蠲緩河南永城等縣錢糧○癸未吳鈞奏臣前見總司核定官制王大臣奏稱今日積弊之難清由於

權限之不分以行政官而兼有立法權則必有藉行政之名義創爲不平之法律而未協輿情以行政官而兼有司法權則必有徇平時之愛憎變更一定之法律以意爲出入以司法官而兼有立法權則必有謀聽斷之便利制爲嚴峻之法律以肆行武健其言深切著明洞見癥結於立憲各國之精義昭若發蒙惟是變更伊始欲一舉而臻完全之域其勢有所不能方今普通教育甫有萌芽上下議院一時未立則立法權不能驟與行政權分離實 朝廷不得已之苦衷爲臣民所共喻至司法獨立揆時度勢最爲切實可行伏讀本年九月二十日奉 上諭刑部著改爲法部專任司法大理寺著改爲大理院專掌審判等因欽此仰見 聖明燭照於審判權與司法行政權之區別辨晰至精以大理院爲全國最高之法院

者卽爲全國審判官與一切行政官對峙分立之基礎嗣大理院奏請定審判權限一摺內稱中國行政司法二權向合爲一今者仰承 明詔以 臣院專司審判與法部截然分離自應將裁判權限等級區畫分明次第建設方合各國憲政之制度至各直省審判衙門應俟官制釐定由法部咨商各督撫次第籌設等因奉 旨依議欽此是則各省審判制度之應行變通早爲 聖明所俞允中外有識之士皆謂此次釐定官制惟司法分立一事最得預備立憲之本原莫不延頸企足以待法院編制之成立然而繩墨之吏安其所習蔽於其希聞或爲種種疑似之談以相撓阻揣其命意不外三端一曰國民程度之未及一曰審判人才之不足一曰行政官權力之淺微而已矣夫以中國人民爲不應受獨立法院之審判者此不通事理之言也澳門香港向爲中國人民之通逃藪其程度可知而葡英二國以其審判法施之矣臺灣向爲中華禮教所未及其程度又可知而日本以其審判法施之矣然猶得諉之曰邊地至內地通商口岸各國租界羣行其領事審判權未聞以華民程度太低致生異議彼方用其審判於中國民人而我轉謂本國人民不應受獨立法院之審判 臣誠痛之至嫌審判人才之不足其說似矣然昔日之州縣不外科舉勞績捐納三途未必素習審判之事一旦身任行政官遂舉一切民刑訴訟付之審判而不疑今若行政與審判分離向之以兩事責一人者今惟以一人專一事夫兼營旁鶩上智猶苦其難用志不

紛中材亦堪自勉轉慮人才之不足此又臣之所未喻也至行政官權力淺微則尤屬一偏之見夫官吏所以有行政權者乃國家予之也權之所在雖以督撫大員不必身親斷獄而其權自尊若夫假審判之權以自便其作福之私而肆其武健嚴酷之手段此正聖世之所不容而宜加屏斥者也臣考東西各國古制其行政司法初亦不分迨後法理日精漸圖分立行政官得盡心於教養而無濫用權力之事故民事日新司法官得以法律保障人民故獄無冤滯倘法權獨立果有妨行政官之權力則彼各國何不守其自古相傳之舊俗而好爲是紛紛也且使行政司法併爲一官而無害於長治久安之計固不妨置爲緩圖乃臣熟查世界各國之情形與夫內地民生疾苦竊以爲司法分立關乎時局安危者甚大而有萬不可以再遲者請爲我皇太后皇上剴切陳之夫國家者主權之所在也法權所在卽主權所在故外國人之入他國者應受他國法庭之審判是爲法權中國通商以來卽許各國領事自行審判始不過以彼法治其民繼漸以彼法治華民而吾之法權日削德意志近且續設其審判司於膠州英設高等審判司於上海日本因之大開法院於遼東其所援爲口實者則以中國審判尚未合東西各國文明之制故遂越俎而代謀更以東三省近日情形言之長春以南徧地有日人長春以北徧地有俄人旣徧住日俄之人民勢將徧設日俄之法院民習於他國之法律遂忘其爲何國之子民法權旣失主權隨之言

念及此可爲寒心夫及今而改良審判其收效已須十餘年溯甲午至今曾幾何時添開口岸已十餘處此後十餘年中雖內政竭力整頓外權且日進而無窮若夫因循苟安坐待法權之侵奪則逃犯不解索債不償赴愬多門人心大去無論治外法權不能收回恐治內法權亦不可得而自保矣是司法制度之不可不分立關乎外交者其一也臣嘗觀自古致亂之故有二一則由於民財之窮盡一則由於訟獄之不平顧民窮財盡尙有拊循賑卹之方惟以訟獄不平激成變故者則鬱怒猝發而不可收泰西各國百年以來皆病行政官之專橫而改設法堂公判之制由是民氣漸靖治化日隆中國審判向由州縣兼司簿書填委積弊叢生非延擱多時卽喜怒任意丁役視爲利藪鄉保借爲護符往往一案未終而家產蕩盡一差甫出而全村騷然遂致驅民入教干涉橫生民教相仇變起不測匪徒乘機煽惑釀爲厲階是國家欲藉州縣官宣德達情而州縣官以濫用法權反致民離吏畔推原其故則以州縣事繁既須撫字而又勞形訴訟跋前疐後兩無所居賢者竭蹶不遑不肖者遂恣睢自逞且審判一事須平日熟諳法律而案情萬變悉待推求行政官以日不暇給之弱用之於非其素習之事必致授機幕友假手書差枉法濫刑何所不至又以層層節制顧忌良多未免曲徇人情無獨立不撓之志若使司法分立則行政官得專意愛民之實政而審判官惟以法律爲範圍兩事既分百弊斷絕是司法制度之不可不分立關乎內政

者又其一也事勢之孔亟如彼斯制之易行如此卽不宣布立憲揆之 聖世恤民保邦之意尙當毅然

決行況 明詔旣頒國是既定毋庸論官制如何變遷惟此司法分立之宗旨萬不宜爲浮說所搖方今

訴訟各法漸次編成法政學堂漸次設立雖審判各廳不能使全國同時並舉而預備之法實行之期或

分省而試行或分年而舉辦必須籌畫於事始豈宜更俟諸異時應請 飭下釐定官制王大臣悉心核

議具奏 迅賜乾斷施行海內幸甚臣不勝迫切屏營之至下考察政治館知之○允趙爾巽奏蠲緩奉

天海城縣等本年應徵錢糧○允端方奏蠲緩江蘇蘇州府等屬本年應徵錢糧○度支部奏請於熱河

勘設官銀行允之○甲申允曹鴻勛奏予故商州直隸州知州李雲維生平政績交國史館立傳○乙酉

劉廷琛奏臣赴日本考察學務歷時三月該國文部省派員講演並導觀各校臣等復以其暇延訪通材

諮諏而研究之惟爲時無多未得盡其覈要謹將大略情形爲我 皇太后 皇上陳之查日本近年學

制益求完備自幼稚園蒙小學以至大學累級遞升秩然有序上焉者求高深之學下焉者施普及之教

故高材各有專精凡民亦具有知識計通國入學者十人而九不識字者蓋鮮矣其能全國劃一則以教

科書咸有定本無曠等亦無參差雖辦法或有變通而程度必歸一致凡修身立行忠君愛國之道皆編

教科童而習之用能人知自愛國鮮叛民近年尤重德育大小各校皆首重人倫道德文部省所講述亦

謂教育不原於道德猶樹木有枝葉而無本根一篇之中三致意焉接見彼都士夫或諄諄以爲言謂其國歐化盛時不免弊害賴以道德救之其推崇我孔孟甚至斯其進步之良者也至規制尤嚴整有法教員非試驗不許濫充無請託之弊學生必約束納於規矩無矯縱之風日人性習勤儉服食刻苦學生皆自攜蔬飯一盂故辦理亦輕而易舉惟師範備宿膳亦甚淡薄從無因飯食細故致啟違言者雖程度較高亦法制有以肅之若實業則鼓舞不遺餘力殘廢亦造就而無棄材海陸軍尤注意經營學制最精成效亦最著此該國學務大概情形也伏念明治維新三十餘年矣其初倍極艱難其中迭經更變不以事既成立而驕怠不以事有失敗而退阻惟其堅忍齊一故能鼓舞振興自今局外觀之其興學可謂盛收效可謂宏矣然彼尤討國人而申儆之且取良法而更張之惟日不足隨時修改以此知其莘莘稱盛皆由堅苦卓絕而得之而卜其方興未有艾也臣愚竊謂政術與時變遷必廣求知能於世界斯理萬世不易必當奉聖道爲依歸蓋風教略殊凡綱常名教之大經我自有立國之道而規模燦著彼設備訓練之陳跡實足爲前事之師至其上一心咸視興學爲國脉民命所關勞費不辭堅持罔懈則尤我國所宜取則者也其學校現行制度具有成書無俟瀆陳探東國之遺風藉作改弦之助酌中原之體俗毋貽膠柱之譏報聞○丙戌以定成爲法部左丞曾鑑爲法部右丞余肇康爲法部左參議王世琪爲法部右參